

2021 年高師大原住民族語朗讀【郡群布農族】編號 1 號

Ibu.Takiludun

1. Ibu, inak mastan manau-uaz tu uvaz-pingaz Maipatasin saikin mas sinkadaidaz su, binis isdaingazin saikin saivanku kasu mas Isbukun tu ludun, sai-ia hai katdan mas hanvang tu asang haitu sai-ia hai itu Takiludun punsuhissabain hamisan tu hainiiapan
2. Ibu, kasu hai inak madungdung masial tu uvaz-pingaz maipatasin saikin mas sinkadaidaz su, binis sipungul saikin saivanku kasu mas Salisin vahlas, isaincia taunghuvaliin tu vali hai mapisbusuk bunun haitu, mastan kahanuasun hai siamas Tatacia naminhamisan tu iviv
3. Ibu, inak makitvaivi tu uvaz-pingaz maipatasin saikin mas sinkadaidaz su, mapising tu binis mudan saikin namaupacin saikin tahu su tu, idadaza sia asang tu lum hai inak tu paitasan mintanan mais is-uka, mintanan mais min-uni hudan muszu sia dalah maltatala isu hainan tu puah
4. Ibu, inak tu libus uvaz-pingaz maipatasin saikin mas sinkadaidaz su, latuza tu na-aiza tu hanian nasidahda kasu mazaku, maszang sidahdah sia lukis tu auhsa haitu malhahai-iap saikin Isu sinkahuzas tu singav hai siamas ludun tu sinkahuzas Isu sinhahainan tu singav hai siamas taklis tu danum latuza tu naaiza tu hanian niang kasu sinidahda
5. Ibu, tastudalah dihanin tu uvaz-pingaz maipatasin saikin mas sinkadaidaz su, inak daidaz hai mas-anak-anak tu iviv mas-anak-anak tu lum Ibu, inak tu daidaz